

# Inscunter a Berna cun la deputaziun grischuna

■ (rtr) **Da temp en temp s'inscuntran RTR e la societad purtadra SRG.R cun la deputaziun grischuna en las chombras federalas a Berna. Ultimamain è quai sta il cas ils 18 da mars 2014.** Questa giada ha il president da la societad purtadra, *Oscar Knapp*, largià il tschertgel da la runda: ina giada cun *Beatrice Baselgia* e *Duri Blumenthal*, commembers da la suprastanza; lura era cun *Gian Ramming*, il schefredactor da RTR ed ils dus correspundents a Berna *Adrian Camartin* e *Claudio Spescha*. Per suttastritgar l'eminenta impurtanza d'ina pli stretga collavuraziun da

las organisaziuns rumantschas, particularmain cun la Lia Rumantscha, è er *Urs Cadruvi*, il secretari general, stà envidà. La preschientscha da la cussegliera federala *Eveline Widmer-Schlumpf* e da la cancelliera federala *Corina Casanova* è dapli che mo in act d'onur: ella demussa il viv interess da las magistratas per il decurs da la Svizra rumantscha.

L'inscunter informal ha pussibilità ina discussiun sur da la situaziun dals meds da massa en general, particularmain dals rumantschs, lur avegnir en connex cun il svilup digital e la stenta per ina collavuraziun

pli effizienta tranter ils divers acturs dals meds da massa rumantschs. En in temp nua che audio, video e text vegnan purschids al public en l'internet savess quai esser ina schanza unica per ina politica cuminaivla dals meds da massa rumantschs.

*Mariano Tschuor*, il directur parentent da RTR, ha prenià la chaschun d'engraziar per la collavuraziun fritgaivla cun «Berna» ils ultims indesch onns che el è sta sco schefredactor e directur tar RTR e per il sustegn politic che garantescha il service public per ina pitschna cuminanza culturala e linguistica.



Da dretg a sanester retscha davos: Gian Ramming, Hansjörg Hassler, Martin Candinas, Duri Blumenthal, Adrian Camartin, Claudio Spescha, Martin Schmid, Urs Cadruvi, Heinz Brand, Stefan Engler; retscha davant: Beatrice Baselgia, Oscar Knapp, Eveline Widmer-Schlumpf, Corina Casanova e Mariano Tschuor.